


ArtViews Aruba

Aruba a haya un medio online pa analisis profesional di arte visual



ORANJESTAD (AAN): E siman aki a lansa e Facebook

page nobo pa Aruba yama "ArtViews Aruba",

ArtViews Aruba ta un 'online site' cu pronto lo brinda critica di e desaroyo di arte visual di Aruba pa e publico di Aruba en general y pa amantenan di arte. Critica di arte visual ta un aspecto importante di desaroyo di arte y

cultura na tur pais desaroya na mundo.

Den e caso di arte visual, "critica" ta un verbo cu internacionalmente kieren describi, analisa, interpreta y evalua. "Arte visual" ta e categoria di arte general cu ta ensera tur e forman di arte expresa visualmente, pues pa mira y contempla. Arte visual ta ensera entre otro pintura, dibuho, collage, assemblage, tur forma di imprenta artistico, arte publico, fotografia, film, escultura, arte 3-dimensional y arte digital.

Arte visual na Aruba a desaroya mas tanto sin por conta riba un tradicion di critica profesional tanto pa e creador di arte como pa e publico en general. Resultado di esaki ta cu pa e creador di arte no tabatin evaluacion serio di nan desaroyo, pues sin por berdaderamente evalua e nivel y calidad di nan arte. Banda di esaki, e publico general tampoco tabata haya evaluacion obhetivo tocante arte y desaroyonan den arte visual. Resultado di esaki ta un falta di seriedad den produccion y un publico sin conosemento necesario di loke ta pasa den nan propio cultura.

Debi na e desaroyo actual di actividad diverso den arte visual, a bira necesario pa por dispone di informacion cu ta trece claridad den un situacion cu pa hopi hende por ta musta caotico. ArtViews Aruba, via e medio moderno di internet, lo ofrece tanto na e artista como na e publico di Aruba maneranan pa upgrade creacion y conosemento di arte visual a base di inspiracion y educacion.

ArtViews Aruba ta un iniciativa completamente independiente.

ArtViews no ta liga na ningun organizacion, gobierno, fundacion of grupo. Di e manera aki por trece informacion obhetivo y a base di conosemento y experiencia profesional riba tereno di creacion di arte visual, historia di arte, y educacion di arte.